



TONGTEPRATEP

A MONTHLY CHURCH BULLETIN OF DIMAPUR AO BAPTIST AROGO • DIMAPUR • VOL-III • ISSUE 12 • 4 PAGES

CHRISTMAS & NEW YEAR BENJONG



Dimapur Ao Baptist Arogo (DABA) Duncan, Dimapur - 797113, Nagaland
Office: 03862 - 226438 / 229032 | Email: daba.tongtepratep@gmail.com, daba@dabaarogo.org

www.dabaarogo.org

EDITORIAL

Tematiba Ratetshiba



●●● Sentiya Along

John 5: 19-20: “Anungji Yisui parnok dang ashi, “Atangji züingpong ni nenok dang shidi, Techiri pa sasa kecha meinyaker; saka Tebui kechi inyakba pai angu, aji dang paia inyaker. Kechiaser Tebui Techir meimer aser pai pei sasa inyakba ajak pa dang sayur. Anungji nenoki süngmangtsüsa item mapa dangi tuluba pai pa dang sayutsü.”

“UN Staff pur lendongbang nung lir, staff indang itasen mangutsü akok” ta osang kaket nung adok. United Nations (UN)-i kümshia sen billion aika indang budget yur inyaksangshir saka ita ishika tejaklen iba ocet tatsü ya sangdong aser iba nung parnok staff nem itasen agütsütsü asoshi timtemer ta shia liasü. Iba ya kechiba ta süra UN nung züingsema aliba linüktemi tenla agütsütsü ta imlaa aliba magütsüba ajanga liasü. Küm ter shi ka jungnüa nung UN-i senotsü timtem tamajungtiba ajurua lir ta Secretary -General Antonio Guterres-ia shia liasü.

2019 October ita nung “Ashikülak ken o ka nung Ranbaxy ex-promoter Shivinder puogo” ta taoksatsü osang ka sangdong. Sen billion aika alangba pharmaceutical company Ranbaxy Laboratories ya Shivinder Singh aser Malvinder Singh na tebui tenzükba liasü aser tang tenai nisungtem ashiochtsüogo ta tai tonglokja lir. Ano külen adianu ana ya okadak kati ka anema ken o benoker rarateper.

Iba tatalokba ana ajanga tematiba jenjang nung alir, tashi akar; alima khuretem majurur ta bilemertema teküpoktiba jenjang tashi ajemzuka aluba tatishitsütem sayur.

Saka, asenoki Laishiba dangi meyipra, nisung kar jenjang teküpok nungi tenzükba ajanga parnok tematiba jenjang nung aliba mesayu. Luk 7:25-30 nung Yisui Baptitsüba Yohan dang tetsürtemi asortem rongnung tematiba ta shia angur. Pai süoshi tanük, tajung masem mesüra chuba kidang mali. Ajisüaka, pa ya ainkar ka dang nungi tuluba; Tsüngremer Jabaso arutsüba indang osang sangdongtsü atema teshimtet osang tongdarji pa

liasü. Saka Yisu-i Tsüngrem yimli nung teküpoktiba jenjang nung alir kaji Baptitsüba Yohan dang nungia tuluba ta tebilemdangtsü onük ka ashi.

Kodang Yisui pa Tsüngremer Jabaso (Yohan 5:19-20) ta ashi, Yihuda nungeri iba ya Tsüngrem mezüingmeshiba den kasa ama züingshi, aser Pa tepsettsü merang. Iba sülen nungi meimchirtemi Yisu tila akümba ajitetogo aser Khristai pa sentsüwangshitsü atema meinyak ta kuli nguogo. Yisui kodanga Pa Tsüngrem den kasa ta mashi saka Jabaso ka ta dang ashi. Tebui mulungba ama pai inyaksü, aser Jabaso ka ama pa kijai kecha inyaksü makok ta ashi aser Tebui ashiba ajak inyak. Tsüngrem den kasa ama pai alitsüü memerang saka pa tazüingla aküm aser meimchirtem ama, pa kilir ka aküm.

Yohan 5:19 nung Yisui teti tebu tashi angaba aser Tebui memulungba kecha meinyakba indang asenok dang sayur. Asenok shinga iba jenjang nungji mali, ajisüaka asenokia iba alizüingji ayutsüla.

Naga nunger sasep nung tematiba ta asübaji kechi? Asenoki tashi, rongsen, mapa tajung amala alima nung tajangzük angubatem tongtipang aser itemji samara asenok nüngdak mali ama bilemer.

Luke 11:27-28 nung tetsür kati Yisu dak tematiba ajitet aser Pa abenba numendenji temoatsü ta ayimten! Saka Yisui la metongshitsü aser Tsüngrem O angashirtem aser tashi angartem aser benschirtemji chichiba temoatsü angurtem lir ta ashi.

Yisui tila akümbaji Pai pa Tebu dang nungi angazükba ka lir. Asenoka angateta aliba tamangertem ama, Yisu dang nungi tila akümba angazüktsü masü noh?

Asenoki Yisu Khrista'er arogo ka ama, iba lima nung Pa temang ka ama, tila makümba aser pei asoshi dang bilemba anema rarara, aser temeim agi sünger aser tila kümer jajara aser Tebui inyakba ama inyakra, alimai ibaji ajitettsü. Küm Tasen nung iba tangatetba bener ayaoktsüji kanga tajung asütsü.

Christian Education Ministry

World Sunday School Day aser Graduation Day

November 3 anogo nung temoatsü ngua monga liasü, taküm küm tanur ajak agi 235 Intermediate III nung graduate asü. Iba tekülem nung Mrs. Asenla Lemtur-i sentong ani aser Rev. Imly Jamir-i Tsüngrem O lemsatep. Duncan, Sümedem, Yinsem, aser Signal tanurtemi saya balala ajanga shilem tajung agi.

Küm piyong sentong balala ajak nung Tsüngrem teyari atenba aser temoatsü asoshi Tsüngrem tenüng asanger.



Idu Mishmi Field Annual Report 2019

Arogopur ajak dangi Tsüngrem temeim salem abener. Amangbapur tamang sarasadem tashi nung küm tenzüker August ita tashi inyaka arubatem tatsü agi yamai:

1. Counselling Training : 7th March
2. Youth Camp : 9th-11th May
3. Children Rally : 27th May
4. Bible Crusade (Revival) 1st Phase : 11th-14th July
5. Women Seminar : 2nd-3rd August

■ SEPTEMBER

1. Mr. Bendang Ao, Evangelist, Anini nung amenoker küm asem tashi takok ngua inyaka arur 8th September nung Anini Town Baptist Arogo tatempang temoatsü tulu ngua agiogo.
2. Evangelist aser Pastor tem den shisalemsatep sentong asem (3) ben tashi 10th September, 4th March & 29th October nung agia liasü.
3. Mr. Limasusang aser Mr. Ayang Longkumer, DABA nungi 21st-22nd September nung arua Roing Town Idu Baptist Church Devotional Sentep bendanga agia liasü.
4. 28th September anogo, Indira Gandhi Government College Tezu nung Idu Mishmi kaketshirtem den telungjem senden ka agia liasü.



Iba senden nung lanurtemi parnok tebilembatem lemsatep dang yamai shia liasü, “nükjidong angateta tongtetsü asoshi tesayuba tajung” (career counseling, awareness camp, seminar) item amala küm nung kenbo sa agütsüdaktsüner. Iba senden nung lanurtem 48 tashi arua aten. Parnok rongnung mamanger 39 liasü.

5. 18th October, 8:00 am nung Rev. I. Wati Jamir ajanga Emuli Arogo tenla ki meshitetba sentong agia liasü.
6. Arogo asem (3) – Emuli, Iduli aser Rukmo Arogo – lokteper revival sentong ka Emuli Arogo nung agia liasü. Omen: “*Tejakleni Oang*” (Go Forward),

Anitet 14:15 nung amendaker October 18-19 tashi iba sentong kanga dang takok ngua agiogo.

7. 25th-27th October nung Liangmai Baptist Church Association Women Department nungi Secretary-i anir parnok 10 tashi asen field arua semdang. Mission mapa inyaksü tejangraba tulu nung arua Mission inyakyim lemsatepa liasü. Parnoki arogo pezü (4) tashi semdang aser 27th October Tekülem (Devotional) Sentep nung shilem tulu agiogo.

- Taküm küm tsüngta nung tamanger maliba yimtsüng nung Tsüngremer osang tajung yimtsüng 22 tashi nung sangtonga liasü:

- i) Hunli aser Desali area nung yimtsüng 7
- ii) Potist aser Jalis area nung yimtsüng 5
- iii) Arzoo area nung yimtsüng 5
- iv) Anehili area nung yimtsüng 5

- Tsüsenba aser Kibuba Benjong arogo ti (8) tashi nung agia liasü.

■ NÜTSÜNG TERENCEK

| Sl. No. | Arogo | Nütsüng |
|---------|----------|---------|
| i | Anini | 3 |
| ii | Roing | 2 |
| iii | Iduli | 5 |
| iv | Dello | 1 |
| v | Kongtong | 7 |
| vi | Rukmo | 1 |
| vii | Italin | 2 |

■ SARASADEMJANG

1. 11th-14th November nung tamanger malidak Anehili area osangtajung sangtongsü (Gospel penetration) sentong lir.
2. Bible Crusade 3rd Phase 20th-22nd December arogo ana (Dambuk aser Bizari) lokteper revival sentong Bizari arogo nung agitsü lir.
3. 12th-25th December C.T.C laishirtem parnok 15 tashi asen field-i arua Holistic Ministry inyaksü lir.
4. Christmas & New Year sentong nung speakertem yimtsüng balalai aotsü lir. Item tongti O jembirtem asoshi aser sentong takok asoshi sarasademjangma.
5. Idu Baptist Arogo Mungdang Anini nung 10th-12th January 2020 nung agitsüba sentong lir.
Tsüngremi iba ocet azünger ajak moajangma.